

Ess werdd Friehling

Omm letzde Sunndaach habb isch e Atzel geseh, die e verderdt Ästje im Schnawwel hadd, e Zeiche, dass e nei Nest baue odder ihr ald Nest ausbessern will, also dasses Friehling werdd. Isch habb nodierlich gleich moin Kumpel Schorsch oogerufe unn habbem dess verzählt.

Doo säter: Dess mett dem Ästje im Schnawwel erinnert mich onn die Arche Noah. Doo hadd de Noah doch aach enn Voochel, allerdings e weiß Daub, fliehe losse unn die iss mettem Olivezweisch im Schnawwel zurick uff soi Arch kumme. Doo wusst de Noah, ess iss Lond in Sicht. Unn mir wisse jetz, dass de Friehling in Sicht iss.

Isch saach: Awwer weil de säst die Dauwe: die kennes nimmi abwarde mettem Friehling, mettem Nesderbaue unn mettem Hochzeitmache, die rucksern unn balze schunn drei Woche doorum, in aller Herrgottsfrieh fonge die oo unn heern nimmi uff.

Sät de Schorsch: Dess sinn doch zwaa verschiedene Dauwe, die so enn Krach mache, klennere unn greeßere. Die greeßere sinn die mett dem Ring um de Hals, die Ringeldauwe, unn die klennere, dess sinn doch die Türkedauwe, odder? Wonn sinn die donn bei uns oigewonnert?

Isch gebb ze Antwort: Ja, dess sinn Türkedauwe. Isch habb noochgeguckt, die hadde in Deutschland so um 1948 erum die erst Brut, seitdem hawwese sich wie verrickt vermehrt, koo Wunner bei 6 bis 8 Brute im Jahr. Awwer die unn die Ringeldauwe hawwe aach vill Verluste, grad schunn dene ihr Eier wernn sogar von de Eichhörner gefresse unn von dene gibt's joo aach immer mehr in unserne Gärten.

Koo Wunner, sät de Schorsch, iwverall draußerum wernn Beem gefällt, doo sucht sich dess Viehzeich halt die Beem in unserne Stadtparks unn zwische de Heiser.

Isch druff: Awwer nitt alle Veechel suche die Stadt: die Turteldauwe, de Pirol unn de Kuckuck zum Beispill sinn vill ze scheu, um midde zwische Mensche, Katze unn Hunde ihr Nesder ze baue, unn wenn die rings um Flerschem koo große, alde Beem mehr finne bleiwe se eweck unn suche sich wo onnerst e Revier.

Doo sät de Schorsch: Aach jetz, doo drauße nooch Hochem zu, hawwe se widder alles abgeroomt, die alde, scheene Beem. Unn was mich besonnners uffgereescht hott, die zwaa starke Pappelle newerm Weeschkreiz onn de ald Hochemer Strooß hawwe se aach abgeschnitte.

Schorsch, saach isch, isch habbs aach geseh. Die hätt merr doch stieh losse kenne, aach in so emm Gewerwegebiet kennt merr ferr e Kreiz unn zwaa Beem denewer e bis-si Platz losse, awwer naa, abhacke unn Beton druff.

Ja, moont de Schorsch, abhacke unn Beton druff. Wenn isch doodroo denk, denk isch onn de Kelsterbacher Wald unn die nei Londebohn. Dess muss alles soi, saache se, weesche dem Fortschritt unn weesche dene Arweitsplätz, unn wenn mirs nitt mache makes die onnern. Himmel noch emol, wonn sät merr endlich, es longt, es gibt hier zuvill Beton unn zu wenisch Beem.

Isch saach: Unn weil die Leit die Beem unn die Veechel hier nimmi finne, misse se mettem Fliecher dorthie wo die noch sinn. Unn deshalb wernn hier noch mehr Beem gefälltt unn immer neie Londebohne gebaut.

Moont de Schorsch: Awwer nor noch so long, bis in de Urlaubsländer aach nor noch Beton iss.

Eiern Honnes